

Pemilihan enam menteri bantu bangun sosio-ekonomi Sabah

UB 18.5.13 #2

Oleh **ABD. NADDIN HJ. SHAIDDIN**
abdunnaddin@yahoo.com

KOTA KINABALU: Pemilihan seramai enam menteri penuh dan empat timbalan menteri dalam portfolio penting akan membantu membangunkan sosio-ekonomi dan infrastruktur selain mampu memainkan peranan penting dalam memperkukuh aspek keselamatan negeri Sabah.

Penganalisis politik tempatan, Ir Prof Madya Dr Rosalam Haji Sarbatly juga yakin hubungan yang baik menteri-menteri yang dilantik dengan kerajaan negeri di bawah kepimpinan Ketua Menteri Datuk Seri Panglima Musa Aman akan memperlihatkan impak positif dan berkesan pada masa yang singkat.

“Perancangan pembangunan infrastruktur dan sosio-ekonomi akan lebih teratur dan berkesan sekiranya penyelidikan secara saintifik dapat dilakukan, dan dalam hal ini Universiti Malaysia Sabah (UMS) boleh membantu,” katanya yang juga Dekan Sekolah Kejuruteraan dan Teknologi Maklumat UMS.

Menurutnya, antara pembangunan yang perlu dilakukan termasuklah pembinaan lebuhraya berkembar Pan Borneo di bawah Kementerian Kerja Raya yang kini diterajui oleh Dato’ Fadilah Yusuf yang berasal dari Sarawak dan dibantu oleh Timbalan Menteri, Datuk Rosnah Abdul Rashid Shirlin.

“Selain itu, sumber tenaga elektrik khususnya tenaga hijau yang kini diterajui oleh Datuk Seri Dr Maximus Ongkili di Kementerian Tenaga, Teknologi Hijau dan Air, dan Pembangunan Sosio-ekonomi penduduk luar bandar yang diterajui oleh Datuk Seri Shafie Afdal,” katanya.

Sabah juga diwakili oleh Menteri di Jabatan Perdana Menteri, Tan Seri Joseph Kurup; Menteri Luar, Datuk Seri Anifah Aman; Menteri Sains Teknologi dan Inovasi, Datuk Dr Ewon Ebin; Menteri Kesejahteraan Bandar, Perumahan dan Kerajaan Tempatan, Datuk Abdul Rahman Dahlan; Timbalan Menteri Pelajaran, Datuk Mary Yap Kian Ching; Timbalan Menteri Pertahanan, Datuk Abdul

Rahman Bakri; dan Timbalan Menteri Pembangunan Wanita dan Masyarakat, Datuk Azizah Mohd Dun.

“Secara peribadi, saya ingin mengatakan senarai menteri Kabinet yang telah dikemukakan oleh perdana menteri sebagai satu percaturan pentadbiran dan politik yang berani bersandarkan kepada kekuatan politik sebenar khususnya dalam meneruskan agenda transformasi negara.

“Datuk Seri Najib juga secara jelas telah keluar daripada kepompong konsep toleransi berdasarkan kepadatan penduduk dan kaum kepada realiti sebenar bersandarkan kepada keperluan untuk didengari dan nilai asas pembentukan Malaysia,” katanya.

Katanya, kejayaan pasukan Najib dalam meneruskan agenda transformasi negara bakal memperkukuh nilai sebenar pembentukan Malaysia yang termeteri sejak tahun 1963 dan akhirnya dapat diterjemahkan kepada perkongsian kekayaan dalam mencapai agenda keadilan sosial.